



An Bhruiséil, 10 Márta 2023
(OR. en)

7311/23

POLMAR 17
POLGEN 28
POLMIL 51
CYBER 55
HYBRID 9
RELEX 329
MARE 8
MAR 38
COMAR 14
JAI 292
CSDP/PSDC 203
CFSP/PESC 418
ENV 227
PECHE 80
TRANS 90

NÓTA CLÚDAIGH

ó:	Ardrúnaí an Choimisiúin Eorpaigh, arna s(h)íniú ag Martine DEPREZ, Stiúrthóir
chuig:	Thérèse BLANCHET, Ardrúnaí Chomhairle an Aontais Eorpaigh
Uimh. an doic. ón gCoim.:	JOIN(2023) 8 final
Ábhar:	TEACHTAIREACHT CHOMHPHÁIRTEACH CHUIG PARLAIMINT NA hEORPA AGUS CHUIG AN gCOMHAIRLE maidir leis an nuashonrú ar Straitéis Mhuirshlándála an Aontais agus ar an bPleanGníomhaíochta a ghabhann léi 'Straitéis fheabhsaithe Slándála Muirí an Aontais Eorpaigh le haghaidh bagairtí muirí atá ag síorathrú'

Gheobhaidh na toscaireachtaí i gceangal leis seo doiciméad JOIN(2023) 8 final.

Faoi iamh: JOIN(2023) 8 final



AN COIMISIÚN
EORPACH

ARDIONADAÍ AN AONTAIS
DO GHNÓTHAÍ
EACHTRACHA AGUS DON
BHEARTAS SLÁNDÁLA

An Bhruiséil, 10.3.2023
JOIN(2023) 8 final

**TEACHTAIREACHT CHOMHPHÁIRTEACH CHUIG PARLAIMINT NA hEORPA
AGUS CHUIG AN gCOMHAIRLE**

**maidir leis an nuashonrú ar Straitéis Mhuirshlándála an Aontais agus ar an bPlean
Gníomhaíochta a ghabhann léi
"Straitéis fheabhsaithe Slándála Muirí an Aontais Eorpaigh le haghaidh bagairtí muirí
atá ag síorathrú"**

I. RÉAMHRÁ

Tá an tslándáil mhuirí ríthábhachtach don Aontas Eorpach (AE) agus dá Bhallstáit. Le chéile, is iad Ballstáit an Aontais an limistéar eacnamaíoch eisiach comhcheangailte is mó ar domhan. Tá geilleagar an Aontais ag brath go mór ar aigéin shábháilte shlána: déantar os cionn 80 % den trádáil dhomhanda a iompar ar muir, agus déantar thart ar dhá thrían de sholáthar ola agus gáis an domhain a eastóscadh ar muir nó a iompar ar muir¹, agus déantar suas le 99 % de na sreafaí sonraí domhanda a tharchur trí cháblaí faoin bhfarraige². Chun rialachas éifeachtach na n-aigéan a áirithiú, chun ár gcuid aigéan agus chun grinneall na n-aigéan a chosaint, agus chun leas iomlán a bhaint as an ngeilleagar gorm inbhuanaithe³, ní mór an réimse muirí domhanda a bheith slán.

Ó bhí 2014 ann, cuireadh an creat chun aghaidh a thabhairt ar dhúshláin slándála ar muir ar fáil le Straitéis Slándála Muirí an Aontais Eorpaigh (SSMAE) agus leis an bplean gníomhaíochta⁴. Spreag an straitéis comhar níos dlúithe idir na húdaráis shibhialtacha agus mhíleata, go háirithe trí mhalartú faisnéise. Chuidigh sé le rialachas riailbhunaithe ar muir a chur chun cinn agus chuir sé borradh faoin gcomhar idirnáisiúnta. Neartaigh sé neamhspleáchas agus acmhainneacht an Aontais freagairt do bhagairtí slándála muirí⁵.

Tá ról ag an Aontas mar sholáthraí slándála muirí domhanda, ar ról é atá ag éirí níos tábhachtaí, trína chuid oibríochtaí cabhlaigh féin a dhéanamh, e.g. Atalanta⁶ agus Irini⁷, trí choincheap na Láithreachtaí Muirí Comhordaithe (CMP)⁸ a chur chun feidhme, agus trí fheasacht ar réimsí muirí a chur chun cinn agus comhoibriú le raon leathan comhpháirtithe seachtracha. Ina theannta sin, le córais oibriúcháin Copernicus um fhaireachas muirí agus faireachas ar theorainneacha, arna gcur chun feidhme ag an nGníomhaireacht Eorpach um Shábháilteacht Mhuirí (EMSA) agus ag an nGníomhaireacht Eorpach um an nGarda Teorann agus Cóstá (Frontex), soláthraítear breathnóireacht spásbhunaithe, lena gcomhlánaítear seirbhísí loingseoireachta shatailítí Galileo.

Tá athruithe móra ag teacht ar an timpeallacht straitéiseach fhoriomlán. Tar éis a hathmhúnlaithe ag an ngéarchéim aeráide agus ag an díghrádú comhshaoil, athmhúnlú arna ghéarú ag an bhfogha míleata neamhdhleathach gan údar a thug an Rúis faoin Úcráin, tá gá le tuilleadh gníomhaíochta ón Aontas mar sholáthraí slándála idirnáisiúnta.

I gcomhréir le Compás Straitéiseach an Aontais don tSlándáil agus don Chosaint⁹, is é is aidhm don nuashonrú sin ar SSMAE agus ar a phlean gníomhaíochta freagairt do na dúshláin nua. Is deis é chun réitigh inbhuanaithe ar fhadhbanna slándála muirí a chur chun cinn. Is deis é freisin chun tuilleadh feabhais a chur ar ról an Aontais go hidirnáisiúnta agus chun rochtain an Aontais a dhaingniú a thuilleadh ar réimse muirí atá ag éirí níos conspóidí.

SSMAE arna thabhairt cothrom le dáta, is creat é don Aontas chun tuilleadh gníomhaíochta a dhéanamh chun a leas ar muir a chosaint, agus chun a shaoránaigh, a luachanna agus a gheilleagar a

¹ JOIN(2022)28 final

² [https://www.europarl.europa.eu/RegData/etudes/IDAN/2022/702557/EXPO_IDA\(2022\)702557_EN.pdf](https://www.europarl.europa.eu/RegData/etudes/IDAN/2022/702557/EXPO_IDA(2022)702557_EN.pdf)

³ COM(2021) 240 final.

⁴ Doiciméad 11205/14 ón gComhairle agus Conclúidí 10494/18 ón gComhairle.

⁵ Conclúidí 9946/21 ón gComhairle.

⁶ <https://eunavfor.eu/>

⁷ <https://www.operationirini.eu/>

⁸ Conclúidí 06256/22 agus 06255/22 ón gComhairle.

⁹ Doiciméad 7371/22 ón gComhairle.

chosaint. Is é an aidhm atá ann an tsíocháin agus an tslándáil idirnáisiúnta a chur chun cinn, agus, an tráth céanna, cloí le prionsabal na hinbhuanaitheachta agus cosaint na bithéagsúlachta. Cuirfidh an tAontas agus a Bhallstáit an straitéis arna tabhairt cothrom le dáta chun feidhme, i gcomhréir lena n-inniúlachtaí sonracha.

II. BAGAIRTÍ SLÁNDÁLA MUIRÍ ATÁ AG TEACHT CHUN CINN AGUS AG FÁS

Tá go leor athraithe ar an gcomhthéacs geopholaitiúil domhanda ó glacadh straitéis slándála muirí an Aontais Eorpaigh in 2014, rud a éilíonn gníomhaíocht nua fheabhsaithe. Léirítear in Anailísiú an Aontais ar Bhagairtí go bhfuil méadú ag teacht ar na bagairtí agus na dúshláin a bhfuil an tAontas ag tabhairt aghaidh orthu, lena n-áirítear bagairtí agus dúshláin sa réimse muirí¹⁰. Tá méadú ag teacht ar an iomaíocht straitéiseach le haghaidh cumhachta agus acmhainní. Tá bagairtí ag éirí níos casta agus níos ilsrathaí, agus tá roinnt tíortha ag iarraidh bunphrionsabail an oird iltaobhaigh a athshainiú, lena n-áirítear é sin a dhéanamh trí sháruithe ar cheannasacht agus teorainneacha náisiúnta. Tá an fogha míleata a thug an Rúis faoin Úcráin tar éis cogadh a thabhairt ar ais don Eoraip agus contúirtí nua a chruthú, chomh maith le héifeachtaí iarmharta diúltacha ar an tslándáil mhuirí agus ar gheilleagar na hEorpa, rud a imríonn tionchar ar shaoránaigh agus ar ghnóilachtaí na hEorpa.

Tá dúshlán á thabhairt don tslándáil mhuirí i roinnt mhaith réigiún, lena n-áirítear díospóidí críochacha agus muirí, iomaíocht le haghaidh acmhainní nádúrtha agus bagairtí ar shaoirse loingseoireachta agus ar chearta gluaiseachta neamhurchóidí agus idirthurais. Cruthaíonn dúshlán den sórt sin teannas in imchuacha farraige ar fud an Aontais amhail an Mheánmhuir, an Mhuir Dhubh agus Muir Bhailt, ar measa fós é mar gheall ar an bhfogha míleata a thug an Rúis faoin Úcráin. Tá méadú tagtha freisin ar na dúshláin atá roimh an tslándáil mhuirí lasmuigh den Eoraip, is é sin i Murascaill na Guine, i Murascaill Áidin, i gCaolas Hormuz, i gCaolas Malacca, agus i Muir na Síne Theas. Tá roinnt tíortha nach de chuid an Aontais iad ag cur lena gcumais agus lena dteanntás ar muir agus tá siad ag gníomhú go haontaobhach. Cuimsíodh leis sin forneart a úsáid nó ceannasacht náisiúnta tíortha eile a shárú. Leis na gníomhaíochtaí sin, cuirtear i gcoinne an smachta reachta agus an oird idirnáisiúnta a bhunaítear ar Choinbhinsiún na Náisiún Aontaithe maidir le Dlí na Farraige (UNCLOS).

Tá an réigiún Ind-Chiúin-Aigéanach, mar a bhfuil na Réigiúin is Forimeallaí (an tAigéan Indiach) agus Tíortha agus Críocha Thar Lear (an tAigéan Ciúin) ag an Aontas, ina limistéar **dian-iomaíochta geopholaitiúla**. Déanann an taispeántas fornirt agus an teannas méadaithe i réigiúin amhail Muir na Síne Theas agus Thoir agus Caolas na Téaváine difear don tslándáil dhomhanda agus bíonn tionchar díreach acu ar shlándáil agus rathúnas na hEorpa. Chun an chobhsaíocht agus an tslándáil a choinneáil ar bun feadh na bpríomhbhealaí loingseoireachta – amhail Caolas Malacca agus Caolas Shingeapór, Corn na hAfraice agus an tAigéan Indiach – ní mór don Aontas agus dá Bhallstáit a láithreachta agus a ngníomhaíocht a leathnú sna réigiúin sin, i gcomhréir le straitéis an Aontais maidir le comhar sa réigiún Ind-Chiúin-Aigéanach.

Meastar go mbeidh drochthionchair shuntasacha fhadtéarmacha **ag an athrú aeráide agus ag truailliú muirí** ar an tslándáil mhuirí. I measc na n-iarmhairtí beidh tuilte i limistéir chósta agus in

¹⁰ Is éard atá in Anailísiú an Aontais ar Bhagairtí anailís chuimsitheach fhaisnéisbhunaithe ar an raon bagairtí agus dúshlán a dtugann an tAontas aghaidh orthu nó a d'fhéadfadh a bheith air aghaidh a thabhairt orthu amach anseo. Tugtar cothrom le dáta go rialta i agus feidhmíonn sí mar fhaisnéis chúlra chun cuidiú le forbairt agus cur chun feidhme Chompás Straitéiseach an Aontais don tSlándáil agus don Chosaint.

oileáin, cailliúint sceireacha coiréil, mangróbh agus bogaigh eile, agus ídiú stoc éisc¹¹. Feidhmíonn an t-athrú aeráide agus díghrádú an chomhshaoil mar iolraitheoirí riosca tríd an éagobhsaíocht agus an neamhionannas a mhéadú, rud a chuireann leis an gcoireacht thrasnáisiúnta, leis an bpíoráideacht agus leis an teannas i dtaca le hacmhainní muirí. Chuige sin, tá gá le prionsabal nua a chuirfidh ar a chumas don Aontas an tsochaí a dhéanamh níos athléimní ó thaobh na haeráide de, an dúlra a chosaint agus díghrádú na n-éiceachóras a aisiompú¹². Os a choinne sin, d'fhéadfadh sé go mbeadh damáiste don chomhshaoil mar thoradh ar bhearnaí sa tslándáil mhuirí, amhail bac ar rochtain ar láithreáin éillithe, atreorú cistí ó chosaint an chomhshaoil nó gníomhartha sabaitéireachta i gcoinne an bhonneagair mhuirí. Ina theannta sin, ní hamháin gur eascair iarmhairtí millteacha daonna agus eacnamaíocha as an bhfogha míleata a thug an Rúis faoin Úcráin, ach tá cailliúint shuntasach bithéagsúlachta ann freisin¹³. Tá sé tábhachtach, dá bhrí sin, dul i ngleic leis na hidirghníomhaíochtaí idir an t-athrú aeráide, díghrádú comhshaoil na limistéar cósta agus muirí, agus an tslándáil mhuirí, lena n-áirítear é sin a dhéanamh trí thaighde spriocdhírithé leanúnach agus nua.

I ngeall ar ionsaithe 2022 ar phíblínte Nord Stream i Muir Bhailt, ar fheithiclí neamhúdaraíthe gan foireann a bheith thart ar shuiteálacha amach ón gcósta sa Mhuir Thuaidh agus ar **na hionsaithe hibrídeacha agus na cibirionsaithe** athfhillteacha **atá dírithe ar bhonneagar muirí**, ní mór don Aontas a chuid gníomhaíochta a threisiú agus a bhonneagar criticiúil a chosaint ar bhealach níos éifeachtaí, go háirithe trí theicneolaíochtaí nuálacha a fhorbairt. De réir mar a dhéantar claochlú digiteach ar an tionscal muirí, tagann méadú ar a chastacht agus ar leochaileachtaí a d'fhéadfadh a bheith ann. Tá méadú ag teacht ar an dóchúlacht go n-úsáidfídh gníomhaithe mailíseacha modhanna hibrídeacha agus cibearmhodhanna chun díriú ar bhonneagar muirí, lena n-áirítear cáblaí agus píblínte faoin bhfarraige, chomh maith le calafoirt agus longa. Sa Mholadh ón gComhairle maidir le cur chuige comhordaithe uile-Aontais chun athléimneacht an bhonneagair chriticiúil a neartú¹⁴, aithnítear an gá sin le gníomhaíocht. Ina theannta sin, sa mholadh ón gCoimisiún maidir le spriocanna athléimneachta an Aontais de dheasca tubaiste, leagtar amach bearta lenar féidir rannchuidiú le hullmhacht níos fearr ag an Aontas agus na Ballstáit le haghaidh tubaistí nádúrtha agus tubaistí de dhéantús an duine agus lena gcumas freagairt dóibh, lena n-áirítear tubaistí ar muir¹⁵.

Bagairtí agus gníomhaíochtaí aindleathacha – **amhail an phíoráideacht agus robáil armtha ar muir, coireacht eagraithe, lena n-áirítear smuigleáil imirceach agus gáinneáil ar dhaoine, gáinneáil ar airm agus támhshuanaigh, sceimhlitheoireacht, iascaireacht neamhdhleathach, neamhthuairiscithe agus neamhrialáilte, gníomhaíochtaí neamhdhleathacha eile, lena n-áirítear taiscéalaíocht neamhúdaraíthe i limistéir eacnamaíocha eisiacha Bhallstáit an Aontais, agus ordanás neamhphléasctha¹⁶ ar muir** – is dúshlán chomh ríthábhachtach céanna iad fós san iliomad réigiún, agus tá roinnt limistéir chósta agus críocha iargúlta de chuid an Aontais an-leochaileach. D'fhéadfadh droch-shlándáil calafort cuid de na gníomhaíochtaí aindleathacha sin a éascú. Féadfaidh gníomhaithe mailíseacha na bagairtí agus na gníomhaíochtaí sin a chomhcheangal chun ionsaithe hibrídeacha a dhéanamh in aghaidh an Aontais agus a Bhallstát.

¹¹ SROCC ó IPCC (2019) agus an tuarascáil ó Mheitheal II, AR6 (2022).

¹² COM(2020) 380 final.

¹³ Go háirithe, méadú scanrúil ar bhásmhaireacht céiticeach sa Mhuir Dhubh.

¹⁴ 2023/C 20/01

¹⁵ COM(2023) 61 final agus 2023/C 56/01.

¹⁶ Tagraíonn ordanás neamhphléasctha d'airm phléascacha (buamaí, sliogáin, gránáidí, mianaigh thalún, mianaigh chabhlaigh, cnuasmhuinisean, agus muinisin eile) nár phléasc lena mbaineann baol madhmtha fós, uaireanta blianta fada tar éis iad a úsáid nó a chaitheamh amach.

III. LEASANNA SLÁNDÁLA MUIRÍ AN AONTAIS

I bhfianaise na mbagairtí slándála muirí atá ag teacht chun cinn, is iad seo a leanas leasanna bunúsacha an Aontais:

- slándáil an Aontais, a Bhallstát, a shaoránach agus a chomhpháirtithe;
- síocháin agus cobhsaíocht dhomhanda a chaomhnú, agus bealaí loingseoireachta muirí a choinneáil saor agus ar oscailt;
- seasamh leis an dlí idirnáisiúnta, go háirithe UNCLOS mar an creat dlíthiúil uileghabhálach lena rialaítear gach gníomhaíocht san aigéan, agus rialachas fóna idirnáisiúnta na n-aigéan a chur chun cinn, lena n-áirítear é sin a dhéanamh trí choinbhinsiúin réigiúnacha farraige, chomh maith le cur chun feidhme chomhaontú EDT maidir le fóirdheontais iascaigh¹⁷;
- acmhainní nádúrtha agus an comhshaoil muirí a chosaint, agus bainistiú a dhéanamh ar thionchar an athraithe aeráide agus an díghrádaithe comhshaoil ar an tslándáil mhuirí;
- athléimneacht agus cosaint bonneagair mhuirí chriticiúil¹⁸ (ar tír agus amach ón gcósta) a áirithiú, lena n-áirítear é sin a dhéanamh trí aghaidh a thabhairt ar na rioscaí agus na bagairtí a bhaineann leis an athrú aeráide, agus ar na rioscaí agus na bagairtí a eascraíonn as infheistíochtaí díreacha coigríche;
- athléimneacht agus cosaint mol lóistíochta a neartú, i.e. calafoirt, lena n-áirítear aghaidh a thabhairt ar rioscaí a bhaineann le héilliú agus gníomhaíochtaí aindleathacha;
- gníomhaíochtaí eacnamaíocha ar muir a chosaint, agus ar an gcaoi sin rannchuidiú le geilleagar gorm inbhuanaithe (ar tír agus amach ón gcósta araon);
- teorainneacha seachtracha an Aontais, agus slándáil inmheánach an Aontais, a chosaint chun aghaidh a thabhairt ar smuigleáil imirceach, gáinneáil ar dhaoine agus gníomhaíochtaí neamhdhleathacha eile, lena n-áirítear gníomhaíochtaí taiscéalaíochta agus druileála neamhúdaráithe do hidreacarbóin;
- an acmhainneacht gníomhú go pras agus go héifeachtach sa réimse muirí, agus i réimsí eile oibriúcháin (i.e. talamh, aer, cibearspás agus cianspás), a áirithiú;
- sábháilteacht agus slándáil maraithe a áirithiú i gcomhréir le ceanglais an Choinbhinsiúin Oibreachais Mhuirí agus le coinbhinsiúin ábhartha eile na hEagraíochta Idirnáisiúnta Saothair.

IV. FREAGAIRT AN AONTAIS A NEARTÚ

Leis an straitéis slándála muirí nuashonraithe, cuideofar le leasanna an Aontais a liostaítear thuas a chosaint ar na bagairtí slándála muirí atá ag teacht chun cinn agus ag dul i méid. Chuige sin, cuirfidh an tAontas dlús le gníomhaíocht faoi shé cinn de chuspóirí straitéiseacha:

¹⁷ https://www.wto.org/english/tratop_e/rulesneg_e/fish_e/fish_e.htm

¹⁸ Mar shampla, cáblaí agus píblínte faoin bhfarraige, moil lóistíochta (i.e. calafoirt), suiteálacha fuinnimh in-athnuaite amach ón gcósta, ardáin ola agus gáis amach ón gcósta, etc.

1. dlús a chur le gníomhaíochtaí ar muir;
2. comhoibriú le comhpháirtithe;
3. a bheith chun tosaigh maidir le feasacht ar réimsí muirí a threorú¹⁹;
4. rioscaí agus bagairtí a bhainistiú;
5. feabhas a chur ar chumais;
6. oideachas agus oiliúint a chur ar fáil.

Faoi na cuspóirí straitéiseacha sin leanfaidh gníomhaíocht an Aontais de bheith faoi threoir phrionsabail SSMAE 2014: cur chuige trasearnála, sláine fheidhmiúil, urraim do rialacha idirnáisiúnta – an dlí idirnáisiúnta, cearta an duine agus an daonlathas agus comhlíonadh iomlán UNCLOS – agus an t-iltaobhachas muirí. SSMAE arna thabhairt cothrom le dáta, cuirfear chun feidhme é trí bhíthin Plean Gníomhaíochta (**in iarscríbhinn**) agus faoi chuimsiú an Chur Chuige Comhtháite²⁰. Chun an straitéis a chur chun feidhme, i gcomhar lena Bhallstáit, úsáidfídh an tAontas na beartais, na huirlisí agus na hionstraimí ábhartha ar fad, idir shibhialtach agus mhíleata, agus comhordóidh sé beartais agus gníomhaíochtaí na ngníomhaithe ábhartha ar fad ar an leibhéal Eorpach, réigiúnach agus náisiúnta, agus a sineirgí agus a gcomhlántacht á neartú. Ina theannta sin, cuirfidh an straitéis rannpháirtíocht níos comhleanúnaí de chuid an Aontais chun cinn i gcoinbhleachtaí agus i ngéarchéimeanna seachtracha, chun feabhas a chur ar shlándáil an Aontais agus a chuid saoránach.

Beidh gníomhaíochtaí a bhaineann go sonrach le gach imchuach farraige ar fud an Aontais mar chuid den straitéis arna tabhairt cothrom le dáta. Ba cheart straitéisí réigiúnacha an Aontais²¹ agus cláir fothaithe acmhainneachta a chur san áireamh sa ghníomhaíocht, chomh maith le comhar le tíortha comhpháirtíochta.

1. Dlús a chur le gníomhaíochtaí ar muir

Iarrtar i gCompás Straitéiseach an Aontais go ndéanfaí rannpháirtíocht an Aontais maidir leis an

¹⁹ Is éard atá i bhfeasacht ar réimsí muirí tuiscint éifeachtach ar ghníomhaíocht a bhaineann leis an réimse muirí a d'fhéadfadh tionchar a imirt ar shlándáil, sábháilteacht, geilleagar nó comhshaol an Aontais Eorpaigh agus a Bhallstát. Ar bhonn riachtanais agus cearta úsáideoirí a shainítear go soiléir, tugann sí cúnamh do na húdaráis atá freagrach as gníomhaíochtaí faireacháin agus faireachais gach cás, imeacht agus gníomh den sórt sin a bhaineann le réimse muirí an Aontais a chosc agus a bhainistiú ar bhealach cuimsitheach. Cuimsíonn réimse muirí an Aontais Uiscí Teorann, Limistéir Eacnamaíocha Eisiacha agus Ardáin Ilchríochacha Bhallstáit an Aontais mar a shainmhínítear i gCoinbhinsiún 1982 na Náisiún Aontaithe maidir le Dlí na Farraige chomh maith leis na gníomhaíochtaí muirí uile a dhéantar iontu, ar ghrinneall na farraige, ar an bhfodhromchla, ar dhromchla na farraige agus os cionn na farraige amhail suiteálacha, lasta, báid bheaga agus soithí a bhfuil bratach an Aontais ar foluain acu, atá faoi úinéireacht nó bainistíocht an Aontais nó atá faoi cheangal aige.

²⁰ Tarraingíonn an 'cur chuige comhtháite maidir le coinbhleachtaí agus géarchéimeanna seachtracha' ó Straitéis Dhomhanda an Aontais 2016 (Conclúidí ón gComhairle: EUCO 26/16 agus 13202/16) agus formhuiníodh é i gConclúidí 2018 ón gComhairle (5413/18). Sainithnítear ann creat le haghaidh rannpháirtíocht níos comhleanúnaí agus níos iomlánaíche ag an Aontas i gcoinbhleachtaí agus géarchéimeanna seachtracha agus cuireann sé slándáil an duine chun cinn agus, ar an gcaoi sin, cuirtear le slándáil an Aontais agus a chuid saoránach freisin.

²¹ Amhail an Straitéis Chuimsitheach leis an Afraic (JOIN(2020) 4 final), Straitéis an Aontais maidir le Murascaill na Guine (7671/14), Straitéis an Aontais don réigiún Ind-Chiúin-Aigéanach (JOIN(2021) 24 final), beartas an Aontais maidir leis an Artach (JOIN(2021) 27 final), an Straitéis maidir leis na Réigiúin is Forimeallaí COM(2022).

tslándáil mhuirí a neartú a thuilleadh. Faoi chreat **an Chomhbheartais Slándála agus Cosanta (CBSC)**, tá Oibríocht Atalanta ag feidhmiú san Aigéan Indiach Thiar ó bhí 2008 ann. I bhfianaise a teiste rathúla, leathnaíodh sainordú Oibríocht Atalanta ón gcomhrac i gcoinne na píoráideachta go hoibríocht slándála muirí níos leithne agus tá naisc agus sineirgí á neartú aige a thuilleadh leis an Misean Eorpach um Fheasacht Mhuirí i gCaolas Hormuz²². Sa Mheánmhuir, tá sé mar phríomhchúram ar Oibríocht Irini trádbhac arm na Náisiún Aontaithe ar an Libia a fhorfheidhmiú. Is rannchuidiú díreach ón Aontas é sin leis an tsíocháin agus an chobhsaíocht sa Mheánmhuir, rud a chuireann leis an tslándáil mhuirí. I gcomhréir leis an gCur Chuige Comhtháite, rannchuidíonn an tAontas freisin le feabhas a chur ar an tslándáil mhuirí trí oiliúint agus fothú acmhainneachta a sholáthar do chomhpháirtithe trí mhisin shibhialtacha CBSC, amhail Misean Fothaithe Acmhainneachta an Aontais Eorpaigh sa tSomáil.

In 2021 thug an tAontas isteach coincheap nua na **Láithreachtaí Muirí Comhordaithe (CMP)**. Is é is aidhm don uirlis sholúbtha nua seo borradh a chur faoi rannpháirtíocht chomhchoiteann an Aontais maidir leis an tslándáil mhuirí tríd an úsáid is fearr a bhaint as sócmhainní cabhlaigh na mBallstát i réimsí a bhfuil leas straitéiseach ag an Aontas iontu. I gcomhthéacs CMP, ba cheart don Aontas dlús a chur leis an gcomhrac i gcoinne gníomhaíochtaí neamhdhleathacha agus aindleathacha ar muir, lena n-áirítear gáinneáil ar dhrugaí. Ar bhonn na taithí a fuarthas trí chur chun feidhme CMP i Murascaill na Guine agus san Aigéan Indiach Thiar Thuaidh (lena n-áirítear an Mhuir Rua), déanfaidh an tAontas limistéir leasa mhuirí nua a mheá maidir leis an gcoincheap sin a chur chun feidhme. Dá mbunófaí limistéir leasa mhuirí nua, chuirfí le feasacht staide, comhpháirtíochtaí agus cultúr straitéiseach an Aontais mar ghníomhaí slándála muirí.

Cuirtear i dtábhacht i **gCompás Straitéiseach an Aontais** freisin a thábhachtaí atá sé ullmhacht agus idir-inoibritheacht a áirithiú i measc fhórsaí cabhlaigh Bhallstáit an Aontais, agus iarrtar ar an Aontas freachnaimh bheo a dhéanamh i ngach réimse. Dá bhrí sin, seolfaidh an tAontas freachnamh bliantúil cabhlaigh chun ullmhacht a threisiú, chun idir-inoibritheacht a chothú agus chun dul i ngleic leis na bagairtí ar an tslándáil mhuirí atá ag teacht chun cinn.

Déanann an Coimisiún, le cúnamh ó EMSA, cigireachtaí slándála muirí i gcalafoirt, i saoráidí calafoirt agus i longa san Aontas, agus tá sé ag féachaint ar bhealaí chun feabhas a chur ar an tslándáil mhuirí i réimsí amhail longa paisinéirí nó an chibearshlándáil. I gcomhréir leis na treoirlinnte straitéiseacha maidir le **Bainistiú Comhtháite ar Theorainneacha**²³ na hEorpa, ní mór an córas um fhaireachas ar theorainneacha farraige a bheith in ann gach soitheach a thagann isteach in uiscí teorann a bhrath, a shainaithint agus, más gá, a rianú agus a idircheapadh agus rannchuidiú lena áirithiú go ndéanfar beatha daoine ar muir a chosaint agus a shábháil i ngach saghas aimsire. Ba cheart do na Ballstáit an leas is fearr is féidir a bhaint as na cumais faireachais atá á dtairiscint ag Frontex chun cumais náisiúnta agus feasacht fhoriomlán staide a uasghrádú.

Déanann **Frontex** oibríochtaí amhail Indalo, Themis agus Poseidon chun teorainneacha an Aontais a rialú agus chun an choireacht sa Mheánmhuir a chomhrac, go háirithe smuigleáil neamhdhleathach imirceach. Déanann Frontex, an Ghníomhaireacht Eorpach um Rialú ar Iascach (EFCA) agus EMSA oibríochtaí muirí ilchuspóireacha chun an choireacht trasteorann a chomhrac, lena n-áirítear smuigleáil imirceach agus gáinneáil ar dhaoine, chun truailliú muirí agus iascaireacht neamhdhleathach a bhrath, agus chun cúraimí faireachais eile a dhéanamh san iliomad imchuach farraige ar fud an Aontais, lena n-áirítear an Mhuir Dhubh. Ba cheart don Aontas na hoibríochtaí

²² <https://www.diplomatie.gouv.fr/en/french-foreign-policy/europe/news/article/european-maritime-awareness-in-the-soh-emasoh-political-statement-by-the>

²³ COM(2022) 303.

ilchuspóireacha tábhachtacha sin a fhorbairt a thuilleadh.

Is iad seo a leanas príomhghníomhaíochtaí an Aontais²⁴ maidir le feabhas a chur ar an tslándáil mhuirí:

- freachnamh bliantúil cabhlaigh AE a eagrú;
- oibríochtaí cabhlaigh AE (Atalanta agus Irini) atá ann cheana a threisiú le sócmhainní cabhlaigh agus aeir;
- limistéir leasa mhuirí nua a mheá maidir le coincheap CMP a chur chun feidhme, ar bhonn na gceachtanna a foghlaimíodh agus na dtograí ón tSeirbhís Eorpach Gníomhaíochta Seachtraí;
- dlús a chur leis an gcomhrac i gcoinne gníomhaíochtaí neamhdhleathacha agus aindleathacha ar muir, lena n-áirítear gáinneáil ar dhrugaí, i gcomhthéacs CMP;
- cigireachtaí slándála muirí a choinneáil ar bun agus a threisiú san Aontas agus aghaidh a thabhairt ar an gcibearshlándáil agus ar shlándáil long paisinéirí;
- dlús a chur leis an gcomhar ar leibhéal an Aontais maidir le feidhmeanna garda cósta trí fhorbairt oibríochtaí ilchuspóireacha muirí a chur chun cinn in iliomad imchuach farraige ar fud an Aontais.

2. Comhoibriú le comhpháirtithe

Tá an tAontas tar éis caidreamh agus sineirgí a chothú cheana féin maidir leis an tslándáil mhuirí le heagraíochtaí iltaobhacha agus réigiúnacha ar an leibhéal domhanda agus ar an leibhéal réigiúnach araon (e.g. leis na Náisiúin Aontaithe, leis an Eagraíocht Mhuirí Idirnáisiúnta²⁵, le ECAT, leis an Aontas Afracach²⁶ agus le Comhlachas Náisiúin na hÁise Thoir Theas²⁷) agus le roinnt tíortha nach de chuid an Aontais iad, go háirithe i Murascaill na Guine agus sa réigiún Ind-Chiúin-Aigéanach.

Tá comhar idirnáisiúnta forbartha ag an Aontas agus a Bhallstáit freisin trí idirphlé déthaobhach, cuairteanna ar chalafoirt agus freachnaimh bheo, go háirithe sa **réigiún Ind-Chiúin-Aigéanach**, e.g. leis an Astráil, leis an tSeapáin, leis an India, leis an Indinéis, le Poblacht na Cóiré, le hÓman agus le Singeapór. Glacann oibríochtaí Atalanta agus Irini páirt i sásraí um roinnt feasachta agus rannpháirtíocht iltaobhach, lena n-áirítear Comhdhálacha um Fheasacht Chomhroinnte agus Díchoinbhleachtú. Soláthraíonn an tAontas Eorpach tacaíocht shuntasach freisin don tslándáil mhuirí faoina chomhar um fhorbairt, a chabhair dhaonnúil, agus a bhearta tacaíochta don bheartas eachtrach.

²⁴ Le príomhghníomhaíochtaí an Aontais a liostaítear faoi gach ceann de na sé chuspóir shonracha déantar achoimre ar ghnéithe tábhachtacha de na gníomhaíochtaí a chuirtear i láthair go mion sa phlean gníomhaíochta.

²⁵ Eagraíocht Mhuirí Idirnáisiúnta na Náisiún Aontaithe.

²⁶ An tAontas Afracach.

²⁷ Le fada an lá, tá an tslándáil mhuirí ina tosaíocht chomhroinnte ag an Aontas agus ag Comhlachas Náisiúin na hÁise Thoir Theas araon. Dhírigh an comhar idir an dá réigiún ar fhreagairt do bhagairtí muirí trasnáisiúnta amhail an phíoráideacht, an smuigleáil, an inimirce neamhdhlíthiúil, rioscaí tubaiste agus tionchair an truailithe agus an athraithe aeráide. Tacaíonn an tAontas leis an bpróiseas atá faoi stiúir Chomhlachas Náisiúin na hÁise Thoir Theas chun Cód Iompair a bhaint amach i Muir na Síne Theas; <https://euinasean.eu/maritime-cooperation/>

San **Aigéan Indiach Thiar**, tacaíonn an tAontas le hailtireacht réigiúnach mhuirí atá bunaithe ar chomhleá faisnéise agus ar ionaid oibríochta i Madagascar agus sna Séisíil, agus ar Chód Iompair Djibouti maidir leis an bPíoraideacht agus an Robáil Armtha in aghaidh Longa san Aigéan Indiach Thiar agus i Murascaill Áidin a chur faoi Chois²⁸.

Ar an gcaoi chéanna, i **Murascaill na Guine**, tacaíonn an tAontas le heagraíochtaí réigiúnacha agus le stáit chósta a straitéisí slándála muirí féin a chur chun feidhme, forfheidhmiú an dlí mhuirí agus an ceartas muirí a neartú, slándáil agus sábháilteacht calafort a fheabhsú, agus cur le feasacht ar réimsí muirí agus comhroinnt faisnéise faoi Ailtireacht Yaoundé²⁹. San **Aigéan Atlantach** i gcoitinne, tacaíonn an tAontas leis an gcomhrac in aghaidh gníomhaíochtaí aindleathacha i gcomhar le comhpháirtithe, go háirithe an comhrac in aghaidh na gáinneála ar dhrugaí.

I gcomhthéacs dúshlánach geopholaitiúil, ba cheart don Aontas dlús a chur leis an gcomhar le comhpháirtithe ina chomharsanacht agus i **limistéir mhuirí eile a bhfuil tábhacht straitéiseach ag baint leo**. Tá tábhacht ar leith ag baint leis sin i bhfianaise an fhogha mhíleata a thug an Rúis faoin Úcráin. Cuirfidh an tAontas dlús lena chomhar le ECAT maidir leis an tslándáil mhuirí, ag cur leis na torthaí a baineadh amach agus i gcomhréir leis an tríú Dearbhú Comhpháirteach maidir leis an gcomhar idir an tAontas agus ECAT ó mhí Eanáir 2023. Sa réigiún Ind-Chiúin-Aigéanach, ba cheart don Aontas méadú a dhéanamh ar an malartú taithí le comhpháirtithe maidir leis an tslándáil mhuirí tríd an tionscadal ‘*Enhancing Security Cooperation in and with Asia*’ [An Comhar Slándála san Áise agus leis an Áise a fheabhsú] agus idirphlé déthaobhach agus trí fhéachaint le stádas breathnóra (‘comhpháirtí idirphlé’) a fháil i gComhlachas Imeach an Aigéin Indiaigh. Ba cheart don Aontas a chomhar a dhoimhniú freisin le tíortha agus eagraíochtaí atá ar aon intinn leis, lena n-áirítear fóraim idirnáisiúnta agus réigiúnacha maidir le gnóthaí muirí.

Is iad seo a leanas príomhghníomhaíochtaí an Aontais maidir leis an gcomhar idirnáisiúnta:

- síniú agus daingniú ionstraimí idirnáisiúnta a bhaineann leis an tslándáil mhuirí a spreagadh, go háirithe UNCLOS, agus comhlíonadh agus comhroinnt dea-chleachtas le comhpháirtithe a chur chun cinn agus an dlí idirnáisiúnta a bhaineann leis an tslándáil mhuirí á chur chun feidhme, i bhfóraim ábhartha;
- dlús a chur leis an gcomhar idir foireann an Aontais agus foireann ECAT maidir leis an tslándáil mhuirí chun gach saincheist leasa fhrithpháirtigh sa réimse seo a chumhdach, lena n-áirítear ordanás neamhphléasctha ar muir, ag cur leis na trí Dhearbhú Chomhpháirteacha ó 2016, 2018 agus 2023;
- freachnaimh chomhpháirteacha chabhlaigh a dhéanamh le comhpháirtithe chun an idir-inoibritheacht a threisiú, chomh maith le cuairteanna agus patróil a dhéanamh níos minice ar chalafoirt an Aontais, go háirithe sa réigiún Ind-Chiúin-Aigéanach, i gcomhréir leis an gCompás Straitéiseach;
- oifigigh idirchaidrimh de chuid an Aontais a imscaradh chuig lárionaid um chomhleá faisnéise muirí³⁰ i limistéir leasa mhuirí chun malartú faisnéise agus comhar a chur chun

²⁸ An tSlándáil Mhuirí in Oirthear agus i nDeisceart na hAfraice agus san Aigéan Indiach (MASE), an Clár Slándála Calafort agus Sábháilteachta Loingseoireachta, an Clár Réigiúnach um Shlándáil Mhuirí i Limistéar na Mara Rua, agus CRIMARIO.

²⁹ Na gníomhaíochtaí SWAIMS, PASSMAR agus GoGIN.

³⁰ Is eintitis náisiúnta nó réigiúnacha iad lárionaid um chomhleá faisnéise muirí a bhailíonn faisnéis chun feabhas a chur ar feasacht ar réimsí muirí i limistéar geografach ar leith. In 2022 rinne an tAontas a chéad oifigeach idirchaidrimh a

cinn, lena n-áirítear faisnéis agus comhar maidir le forfheidhmiú an dlí, ceartas agus gnóthaí baile, idir an tAontas agus a chomhpháirtithe agus, i gcás inarb iomchuí, meastóireacht a dhéanamh ar a indéanta atá sé na lárionaid sin um chomhleá a nascadh go díreach le córais ábhartha an Aontais um faireachas muirí;

- stádas Comhpháirtí Idirphlé a lorg don Aontas i gComhlachas Imeall an Aigéin Indiaigh chun feabhas a chur ar ról an Aontais mar chomhpháirtí sa tslándáil mhuirí sa réigiún;
- an comhar idirnáisiúnta a chur chun cinn maidir le malartú faisnéise agus faireachas ar bhonneagar criticiúil muirí, lena n-áirítear cáblaí faoin bhfarraige³¹, agus maidir le slándáil long agus calafort³² chomh maith.

3. Feasacht ar réimsí muirí a threorú

Tá feasacht fhónta ar réimsí muirí rithábhachtach chun a áirithiú gur féidir leis na húdaráis inniúla na bagairtí méadaitheacha agus athraitheacha a dhéanann difear don Aontas a bhrath go tapa agus freagairt dóibh go héifeachtach. Beidh an tAontas ar thús cadhnaíochta san fheasacht ar réimsí muirí trí fheabhas a chur ar bhailiú agus malartú faisnéise idir earnálacha muirí éagsúla³³, agus trí chomhroinnt faisnéise idir na Ballstáit a éascú. Ar an leibhéal idirnáisiúnta, leanfaidh an tAontas dá chuid oibre chun feabhas a chur ar acmhainní na dtíortha comhpháirtíochta maidir leis an bhFeasacht ar Réimsí Muirí trí fhaisnéis a roinnt agus trí fhothú acmhainneachta, go háirithe i Murascaill na Guine agus sa réigiún Ind-Chiúin-Aigéanach.

Ó bhí 2014 ann tá dul chun cinn mór déanta ag an Aontas agus a Bhallstáit maidir le faisnéis a fháil agus a mhalartú sa réimse muirí trí na córais earnáilsonracha a úsáideann údaráis éagsúla a bhfuil baint acu le faireachas muirí a fhorbairt agus a nascadh³⁴. Go háirithe, d'fhorbair an tAontas Eorpach an Timpeallacht Chomónta um Chomhroinnt Faisnéise (CISE)³⁵. Ar bhonn na rannpháirtíochta deonaí, éascóidh CISE an chomhroinnt faisnéise fíor-ama idir údaráis éagsúla atá freagrach as feidhmeanna garda cósta, lena n-áirítear an t-arm, rud a chruthóidh nasc idir na húdaráis lena mbaineann laistigh de na Ballstáit agus ó Bhallstát go chéile. Ar bhonn thionscadal taighde an Aontais CISE 2020, i mí Aibreáin 2019 sheol an Coimisiún idirthréimhse CISE, agus chuir sé a chomhordú de chúram ar EMSA, i ndlúthchomhar leis na Ballstáit³⁶. Agus é ag cur leis an idirthréimhse, tá sé beartaithe ag an gCoimisiún an chéim oibriúcháin a sheoladh in 2024 le tacaíocht ó EMSA, faoi réir chomhaontú a Bhoird Riaracháin.

Maidir le cosaint, ceapadh an tionscadal faireachais mhuirí (MARSUR) le tacaíocht ón nGníomhaireacht Eorpach um Chosaint (GEC) chun é a chur ar a gcumas d'fhórsaí cabhlaigh na mBallstát rannpháirteach faisnéis oibriúcháin mhuirí agus seirbhísí oibriúcháin muirí a mhalartú.

imscaradh chuig an Ionad um Chomhleá Faisnéise i Singeapór, ionad a chumhdaíonn an chuid is mó den réigiún Ind-Chiúin-Aigéanach.

³¹ I gcomhréir le Moladh 2023/C 20/01 ón gComhairle maidir le cur chuige comhordaithe uile-Aontais chun athléimneacht an bhonneagair chriticiúil a neartú.

³² i gcomhréir leis an gCód Idirnáisiúnta um Shlándáil Long agus Saoráid Chalafoirt;
<https://www.imo.org/en/OurWork/Security/Pages/SOLAS-XI-2%20ISPS%20Code.aspx>

³³ Áirítear ar na hearnálacha muirí sábháilteacht agus slándáil an iompair mhuirí, rialú iascaigh, ullmhacht agus freagairt i dtaca le truailliú muirí, cosaint an chomhshaoil mhuirí, custam, rialú teorann, forfheidhmiú ginearálta an dlí agus cosaint.

³⁴ E.g. Eurosur agus SafeSeaNet (córais oibriúcháin ar leibhéal an Aontais).

³⁵ Doiciméad 9946-2021 ón gComhairle.

³⁶ SWD (2019) 322 final.

Soláthraíonn MARSUR breisluach oibriúcháin, mar a fhianaítear leis an bhfíric gur roghnaigh Ballstáit an Aontais é a úsáid chun coincheap CMP a chur chun feidhme i Murascaill na Guine agus san Aigéan Indiach Thiar Thuaidh. Tá GEC agus na Ballstáit rannpháirteacha ag oibriú faoi láthair chun MARSUR a neartú trí chlár tiomnaithe. I gcomhréir leis an gCompás Straitéiseach, a iarrann ar an Aontas a fheasacht staide fhaisnéisbhunaithe agus a chumas a neartú, ba cheart don Aontas leas iomlán a bhaint as na cumais faireachais mhuirí ar fad (e.g. ladraínn, aerárthaí patróil agus teicneolaíocht spásbhunaithe). Is féidir le Clár Spáis an Aontais, trí bhíthin a chomhpháirteanna amhail Copernicus, Galileo agus IRIS³⁷, rannchuidiú go díreach le cur leis an bhFeasacht ar Réimsí Muirí. Tá Lárionad Satailítí an Aontais rannpháirteach freisin san Fheasacht ar Réimsí Muirí trína chuid oibre le hAcmhainneacht Aonair Anailíse Faisnéise an Aontais, agus leis an gCoimisiún maidir le Galileo/Copernicus. I ndáil leis sin, tá athléimneacht agus slándáil na sócmhainní spáis ábhartha rithábachtach chun leanúnachas seirbhísí a áirithiú.

Chuir an tAontas comhar idirghníomhaireachta ar bun idir EFCA, EMSA agus Frontex chun tacú leis na húdaráis náisiúnta garda cósta, lena n-áirítear tacú leo i réimse na feasachta ar réimsí muirí. Is féidir leis an bhFóram Eorpach maidir le Feidhmeanna Garda Cósta agus le Fóram na Meánmhara maidir le Feidhmeanna Garda Cósta rannchuidiú le cur leis an bhfeasacht ar réimsí muirí agus leis an gcomhar oibríochtúil trí dhea-chleachtais a mhalartú.

I gcás tubaistí nó timpistí agus nuair a théitear thar chumas acmhainní náisiúnta, is féidir le Ballstáit an Aontais agus tríú tíortha an Sásra Aontais um Chosaint Shibhialta a ghníomhachtú³⁸. Tríd an Lárionad Comhordúcháin Práinnfhreagartha³⁹, is féidir leo cúnamh, saineolas nó anailís ar an gcás a lorg.

Rannchuidíonn an tAontas freisin le feabhas a chur ar an bhFeasacht ar Réimsí Muirí ar an leibhéal idirnáisiúnta trí thionscnaimh thiomnaithe a reáchtáil maidir le fothú acmhainneachta don chomhar um fhorbairt. Leis an tionscadal ‘Bealaí Muirí Criticiúla sa réigiún Ind-Chiúin-Aigéanach’ (CRIMARIO)⁴⁰ forbraíodh uirlisí sonracha⁴¹ chun feabhas a chur ar an bhFeasacht ar Réimsí Muirí agus chun an comhar le comhpháirtithe réigiúnacha agus idir comhpháirtithe réigiúnacha a neartú. Tá sé sin comhleanúnach le rannpháirtíocht níos leithne slándála agus cosanta an Aontais sa réigiún Ind-Chiúin-Aigéanach. Ar an gcaoi chéanna, leis an tionscadal ‘*Gulf of Guinea Interregional Network*’ (GoGIN) [Líonra Idir-Réigiúnach Mhurascaill na Guine]⁴² forbraíodh ardán YARIS, uirlis comhroinnte faisnéise chun tacú le ‘hAiltireacht Yaoundé’.

Is iad seo a leanas príomhghníomhaíochtaí an Aontais maidir leis an bhfeasacht ar réimsí muirí:

- a áirithiú go mbeidh an Timpeallacht Chomónta um Chomhroinnt Faisnéise i bhfeidhm faoi lár 2024, rud a fhágfaidh go mbeifear in ann faisnéis rúnaicmithe agus neamh-rúnaicmithe a mhalartú ar bhealach slán struchtúrtha i measc údarais ó earnálacha éagsúla faireachais mhuirí (sibhialtach agus míleata);
- an líonra um malartú faisnéise maidir le faireachas muirí cosanta (MARSUR) a neartú trí

³⁷ https://defence-industry-space.ec.europa.eu/welcome-iris2-infrastructure-resilience-interconnectivity-and-security-satellite-2022-11-17_en

³⁸ [An Sásra Aontais um Chosaint Shibhialta \(europa.eu\)](#)

³⁹ [An Lárionad Comhordúcháin Práinnfhreagartha \(ERCC\)](#)

⁴⁰ Tá CRIMARIO á chistiú ag an gCoimisiún Eorpach le EUR 23 mhilliún idir 2015 agus 2025.

⁴¹ Ardáin IORIS agus SHARE.IT.

⁴² Tá GoGIN á chistiú ag an gCoimisiún Eorpach le EUR 11,5 milliún (2016-2023), agus tá GoGIN II á chistiú aige le EUR 5 mhilliún (2023-2025).

chlár tiomnaithe a sheoladh trí GEC, agus trí fheabhas a chur ar na naisc idir MARSUR agus CISE;

- leas a bhaint as an infheistíocht a dhéantar tríd an mBeartas Eorpach Spáis agus na hacmhainní atá ar fáil trí Copernicus maidir leis an bhfaireachas muirí, leis an bhfaireachán ar an muirthimpeallacht agus leis an athrú aeráide a shaothrú a thuilleadh;
- comhtháthú a dhéanamh ar theicneolaíochtaí spásbhunaithe, ar chórais aerárthaí cianrialaithe agus ar stáisiúin radair, ar aerárthaí patróil muirí, agus ar mhodhanna muiriompair le foireann agus gan foireann trí bhithin uirlisí nuálacha cibear-athléimneacha chun an fheasacht ar réimsí muirí a threisiú;
- dlús a chur le faireachas ar shoithí patróil cósta agus amach ón gcósta agus é a chomhlánú le hardáin chabhlaigh ardleibhéil atá líonraithe go digiteach, lena n-áirítear ardáin chabhlaigh gan foireann chun feabhas a chur ar chumais choisc agus freagartha;
- cumais feasachta na dtíortha comhpháirtíochta ar réimsí muirí a neartú trí thionscadail GoGIN agus CRIMARIO, lena n-áirítear é sin a dhéanamh trí uirlisí um fheasachta ar réimsí muirí (YARIS, IORIS agus SHARE.IT) a oibríochtú a thuilleadh i gcomhar le seirbhísí satailíte Copernicus.

4. Rioscaí agus bagairtí a bhainistiú

I gcomhréir leis an gCompás Straitéiseach, cuirfidh an tAontas agus a Bhallstáit feabhas ar a gcumas comhchoiteann a slándáil a chosaint agus cur lena n-athléimneacht agus a n-ullmhacht i leith dúshláin slándála muirí, lena n-áirítear bagairtí hibrídeacha agus cibearbhagairtí. Ba cheart don Aontas agus dá Bhallstáit a bheith in ann freagairt go tapa, le cumais chomhordaithe shibhialtach agus mhíleata.

Tá an comhrac i gcoinne an athraithe aeráide agus an díghrádaithe comhshaoil ar cheann de phríomhthosaíochtaí polaitiúla an Aontais a léirítear ina ghníomhaíocht sheachtrach trí go leor straitéisí téamacha nó geografacha amhail an Tairseach Dhomhanda nó an Straitéis maidir le Comhar sa réigiún Ind-Chiúin-Aigéanach, agus chomh maith leis sin trí fhor-rochtain taidhleoireachta an Aontais agus trí Thaidhleoireacht Aeráide an Aontais.

Tá céimeanna suntasacha glactha ag an Aontas cheana féin chun an aeráidneodracht a bhaint amach faoi 2050, agus déanfaidh sé tuilleadh gníomhaíochta maidir le fadhbanna a bhfuil nasc acu leis an athrú aeráide, le díghrádú an chomhshaoil agus leis an tslándáil. Tíolacfaidh an tArdionadaí agus an Coimisiún Teachtaireacht Chomhpháirteach maidir leis an nasc idir an t-athrú aeráide, díghrádú an chomhshaoil agus an tslándáil agus an chosaint i lár 2023. Áireofar inti, *inter alia*, tograí le haghaidh uirlisí lena ndéantar measúnú ar chúiseanna agus iarmhairtí an athraithe aeráide agus dhíghrádú an chomhshaoil ar an earnáil mhuirí, ar bhonneagar muirí, agus ar ghnéithe nádúrtha agus gnéithe de dhéantús an duine i limistéir chósta chomh maith, lena n-áirítear a mhéid a bhaineann le luathrabhadh, taighde fianaisebhunaithe agus íomhánna satailíte (e.g. trí chlár Copernicus).

San Artach, tá na hoighearchaidhpeanna ag leá, tá an muiroighear ag cúlú, tá bealaí nua loingseoireachta á n-oscailt de réir a chéile, agus tá coinne leis go gcruthóidh an méadú ar ghníomhaíochtaí an duine bagairtí ar an gcomhshaol agus ar phobail áitiúla nó go gcuirfidh sé leo. I ndáil leis an méid sin, ní mór an Teachtaireacht Chomhpháirteach maidir le ‘Rannpháirtíocht níos

láidre ón Aontas le haghaidh Artach níos glaise, níos síochánta agus níos rathúla⁴³ a oibríochtú a thuilleadh a luaithe is féidir, go háirithe maidir le loingseoireacht astaíochtaí nialasacha san Aigéan Artach, mianadóireacht inbhuanaithe amhábhair criticiúil, agus forbairt inbhuanaithe na réigiún Artach.

Is príomhthosaíocht i gcónaí é bonneagar criticiúil a chosaint sa réimse muirí. Ba cheart don Aontas ról na mBallstát a chomhlánú maidir le hathléimneacht an bhonneagair mhuirí chriticiúil a fhorbairt, amhail píblínte nó cáblaí faoin bhfarraige a ritheann thar theorainneacha náisiúnta muirí. Ba cheart dó feabhas a chur ar na measúnuithe riosca atá ann faoi láthair ar cháblaí faoin bhfarraige agus iad a chomhlánú le roghanna freagartha agus le bearta maolaithe lena gcuirtear le saineolas agus acmhainneachtaí trasearnála. Tá sé rithábhachtach tacaíocht leanúnach a sholáthar do na Ballstáit chun sócmhainní cosanta faoi uisce agus réitigh frithladrann a fhorbairt. Ina theannta sin, ba cheart don Aontas leanúint de chómhaitheachtáil⁴⁴ fuinnimh inathnuaite amach ón gcósta le gníomhaíochtaí cosanta⁴⁵ a éascú, mar a mholtar sa straitéis in-athnuaite amach ón gcósta⁴⁶.

Leis an Treoir maidir le hathléimneacht eintiteas criticiúil⁴⁷ agus leis an Treoir athbhreithnithe maidir le slándáil gréasán agus córas faisnéise (Treoir NIS 2)⁴⁸, tá an tAontas ar thús cadhnaíochta i bhforbairtí ábhartha, agus creat dlíthiúil cuimsitheach aige lena bhféidir leis uasghrádú a dhéanamh ar athléimneacht fhisiceach agus cibear-athléimneacht eintiteas criticiúil agus bonneagair chriticiúil. Ba cheart don Aontas dlús a chur leis an gcomhar sa réimse sin le príomh-chomhpháirtithe agus le tíortha ábhartha nach bhfuil san Aontas, go háirithe tríd an idirphlé struchtúrtha idir an tAontas agus ECAT maidir leis an athléimneacht agus tríd an tascfhórsa maidir le hathléimneacht an bhonneagair chriticiúil.

Tá dúshlán breise roimh an Aontas mar gheall ar líon mór ordanáis neamhphléasctha agus arm ceimiceach a eascraíonn ón gCéad Chogadh Domhanda agus ón Dara Cogadh Domhanda atá suite in imchuacha farraige ar fud an Aontais. Tá an dúshlán sin níos measa fós mar gheall ar an bhfogha míleata a thug an Rúis faoin Úcráin, rud a fhágann go bhfuil líon mór mianach sa Mhuir Dhubh. Ní dhéantar doiciméadú ceart ar chineál, suíomh ná cainníocht an ordanáis sin, rud a chruthaíonn rioscaí don tsábháilteacht mhuirí agus don tslándáil mhuirí, don chomhshaoil (mar gheall ar scaoileadh féideartha ceimiceán) agus do ghníomhaíochtaí an gheilleagair ghairm (e.g. láithreáin fuinnimh in-athnuaite amach ón gcósta a thógáil). Ar bhonn na dtionscadal rathúil atá ann cheana⁴⁹, ba cheart don Aontas aghaidh a thabhairt go práinneach agus go cuimsitheach ar an tsaincheist sin, agus na rioscaí comhshaoil a bhaineann le hordanás neamhphléasctha agus lena ndiúscairt a mhaolú. Beidh sé an-tábhachtach freisin ordanás neamhphléasctha agus mianaigh a fágadh sa Mhuir Dhubh a dhiúscairt go sábháilte, chomh luath agus a cheadaíonn coinníollacha slándála agus polaitiúla é.

⁴³ JOIN(2021) 27 final.

⁴⁴ I gcomhréir leis an Treoir maidir leis an bPleanáil Spásúil Mhuirí, 2014/89/AE.

⁴⁵ An tionscadal ‘Siombóis’ atá ar siúl faoi chomhordú na Gníomhaireachta Eorpaí um Chosaint, le cistí ó Fhis 2020; <https://eda.europa.eu/symbiosis>

⁴⁶ COM(2020) 741 final.

⁴⁷ Treoir (AE) 2022/2557.

⁴⁸ Treoir (AE) 2022/2555.

⁴⁹ Tionscadail chun éifeachtaí na cogaíochta ceimicí agus gnáthmhuinisin a ghlanadh ó Mhuir Bhailt a fhaigheann tacaíocht ó chlár Interreg arna mhaoiniú ag Ciste Forbraíochta Réigiúnaí na hEorpa (CFRE) - [10 years of Interreg cooperation to free the Baltic Sea from dumped munitions - Interreg Baltic Sea Region \[10 mbliana de chomhar Interreg chun muinisin dhumpáilte a ghlanadh ó Mhuir Bhailt - Clár Interreg do Réigiún Mhuir Bhailt\] \(interreg-baltic.eu\)](#).

Baineann gníomhaithe eachtracha an bonn den tslándáil mhuirí freisin, mar gheall ar rioscaí a bhaineann le hinfheistíocht dhíreach choigríche i mbonneagar criticiúil, agus mar gheall ar ionramháil ar fhaisnéis agus trasnaíocht ó ghníomhaithe den sórt sin. Tabharfar aghaidh ar na saincheisteanna sin trí na hionstraimí agus na creataí ábhartha; e.g. déanfar infheistíocht dhíreach choigríche a scagadh i gcomhréir leis an Rialachán ábhartha⁵⁰.

Tá measúnú riosca á dhéanamh ag an gCoimisiún agus ag na Ballstáit d'fhonn treoir a chur ar fáil chun feabhas a chur ar shlándáil long paisinéirí san Aontas.

Is iad seo a leanas príomhghníomhaíochtaí an Aontais maidir le bainistíocht riosca agus bagairtí:

- freachnaimh bheo rialta lánscála a dhéanamh ar leibhéal an Aontais, lena ndíreofar ar chosaint calafort agus ar bhagairtí amhail cibearbhagairtí agus bagairtí hibrídeacha a chomhrac, sa bhreis ar an bhfreachnamh bliantúil cabhlaigh a luaitear thuas;
- acmhainní agus uirlisí faireachais (e.g. RPAS) a imscaradh agus a áirithiú go mbainfear an úsáid is fearr is féidir as na seirbhísí spáis atá ann faoi láthair agus a bheidh ann amach anseo (amhail faire na cruinne) chun patróil a dhéanamh ar bhonneagar criticiúil muirí agus chun é a chosaint;
- pleananna AE um chomhar réigiúnach a fhorbairt chun faireachas ar bhonneagar faoi uisce agus amach ón gcósta a áirithiú;
- creat comhleanúnach a fhorbairt chun aghaidh a thabhairt ar na bagairtí a bhaineann le hordanás neamhphléasctha, airm ghníomhacha agus airm cheimiceacha ar muir, faireachán a dhéanamh orthu agus iad a bhaint trí theicneolaíochtaí nuálacha a úsáid agus leis an tionchar is lú is féidir ar an gcomhshaol;
- feabhas a chur ar luathrabhadh agus fadbhreathnaitheacht straitéiseach, trí úsáid a bhaint as seirbhísí spáis *inter alia*, a mhéid a bhaineann le héifeachtaí an athraithe aeráide, go háirithe ardú ar leibhéal na farraige, borradh stoirme, agus díghrádú an chomhshaoil;
- measúnuithe riosca, pleananna teagmhais agus pleananna athshlánaithe ó thubaiste (ar leibhéal an Aontais agus ar an leibhéal náisiúnta) a tharraingt suas as an nua nó na cinn atá ann cheana a threisiú do chalafoirt agus do bhonneagar cósta, agus do shlándáil long paisinéirí agus slabhraí iompair/soláthair chomh maith;
- malartú dea-chleachtas a spreagadh idir gníomhaithe muirí maidir le cibearbhagairtí, agus aghaidh a thabhairt tuilleadh ar an gcibearshlándáil ar leibhéal na hEagraíochta Muirí Idirnáisiúnta;
- feachtas ar an réimse muirí a fheabhsú san Artach, lena n-áirítear breathnóireacht ó spás; rannpháirtíocht leanúnach le Stáit chósta Artacha, go déthaobhach agus i bhfóraim iltaobhacha ábhartha, de réir mar is iomchuí, chun tacú le cur chun feidhme an Bheartais maidir leis an Artach⁵¹;
- measúnú a dhéanamh ar an bhféidearthacht tionscadail inathnuaite amach ón gcósta agus úsáidí inbhuanaithe eile a imscaradh i limistéir mhuirí a fhorchoimeádtar nó a úsáidtear le haghaidh gníomhaíochtaí míleata;
- measúnú a dhéanamh ar infheistíocht sa bhonneagar muirí ag tíortha agus eintitis nach bhfuil san Aontas i gcomhthéacs an tsásra comhair a bunaíodh leis an Rialachán maidir le

⁵⁰ Rialachán (AE) 2019/452.

⁵¹ Join(2021)27 final.

hinfheistíochtaí díreacha coigríche a scagadh.

5. Feabhas a chur ar chumais

Chun a leasanna slándála muirí a chur chun cinn, ba cheart don Aontas dlús a chur le forbairt cumas sibhialtach agus míleata araon, agus ról a thabhairt don tionscal de réir mar is iomchuí. Cuimsítear Taighde agus Forbairt (T&F) maidir le gnéithe sibhialtacha de shlándáil mhuirí na hEorpa sa bhraisle de chlár Fís Eorpach an Aontais maidir leis an tSlándáil Shibhialta don tSochaí. T&F atá ann faoi láthair agus atá le teacht, tacóidh sé le forbairt cumais ar leibhéal an Aontais, lena n-áirítear bonneagar criticiúil muirí a chosaint, bagairtí faoi uisce a bhainistiú, ullmhacht agus freagairt do thubaistí antrapaigineacha agus nádúrtha, slándáil an iompair mhuirí paisinéirí, agus bainistiú ordanáis neamhphléasctha, lena mbeidh baint ag an tionscal i gcás inarb iomchuí.

I réimse na cosanta, ba cheart do na Ballstáit réimse iomlán cumas muirí a fhorbairt, agus leas iomlán á bhaint acu as an raon feidhme don chomhar faoi thionscnaimh ghaolmhara de chuid an Aontais⁵². Go háirithe, ba cheart dóibh díriú ar bhorradh a chur faoi chumais chun barrfeabhas an Aontais ar an dromchla a áirithiú, chun cumhacht ar muir a léiriú, chun rialú faoi uisce a chumasú agus chun rannchuidiú leis an aerchosaint.

San athbhreithniú ar an bPlean Forbraíochta um Chumas⁵³ atá beartaithe, bainfear leas freisin as na ceachtanna a foghlaimíodh ón bhfogha míleata a thug an Rúis faoin Úcráin. Mar shampla, fiosróidh GEC na príomhtheicneolaíochtaí is gá chun saithí ladrann muirí gan foireann a bhainistiú agus chun bonneagar criticiúil ar ghrinneall na farraige a chosaint.

Mar a iarradh sa Chompás Straitéiseach agus i gcomhréir leis an Athbhreithniú Comhordaithe Bliantúil ar Chosaint (CARD)⁵⁴, ba cheart é a bheith d'aidhm ag tionscadail náisiúnta agus ilnáisiúnta ilroinnt sócmhainní criticiúla amhail soithí ar mhéid coirbhéid agus córais ar bord a shárú agus feabhas a chur ar éifeachtacht oibríochtúil na n-ardán aonair. Mar thoradh ar roinnt deiseanna comhair a sainaithníodh i dtimthriall CARD 2020, cuireadh tionscadail Buanchomhair Struchtúrtha (PESCO) ar bun maidir le córais mhuirí gan foireann, e.g. an Fheithicil Dromchla Leath-Uathrialaitheach Meánmhéide. Déanfaidh an Ciste Eorpach Cosanta⁵⁵ measúnú ar thionscadail taighde agus forbartha, mar shampla iad sin a bhaineann le feasacht ar réimsí muirí, cumais faireachais mhuirí, cosaint bonneagair mhuirí chriticiúil agus cumais faoi uisce.

Is iad seo a leanas príomhghníomhaíochtaí an Aontais maidir le feabhas a chur ar chumais:

- ceanglais choiteanna agus coincheapa coiteanna a fhorbairt le haghaidh na teicneolaíochta i réimse na cosanta, lena n-áirítear é sin a dhéanamh le haghaidh feasacht ar an réimse muirí, ar an dromchla agus faoin uisce araon;
- córais idir-inoibritheacha gan foireann a thógáil chun faireachán a dhéanamh ar bhonneagar criticiúil muirí, chun cur i gcoinne saithí ladrann naimhdeacha etc.;

⁵² An Plean Forbraíochta um Chumas, na deiseanna comhoibríocha a sainaithníodh faoin Athbhreithniú Comhordaithe Bliantúil ar Chosaint, an Buanchomhar Struchtúrtha, an Ciste Eorpach Cosanta.

⁵³ I mí an Mheithimh 2022 sheol Bord Stiúrtha GEC an t-athbhreithniú ar an bPlean Forbraíochta um Chumas go foirmiúil.

⁵⁴ An réimse fócais 'Longa Dromchla Eorpacha den Aicme Patról'.

⁵⁵ Is é is aidhm don Chiste Eorpach Cosanta iomaíochas agus acmhainneacht nuálaíochta an tionscail cosanta san Aontas a neartú. Dá bhrí sin, rannchuidíonn sé le cumais mhíleata na mBallstát a fhorbairt.

- cur le cumais nua-aimseartha frithbheart mianach, e.g. trí choincheap oibríochtaí de chuid an Aontais a fhorbairt;
- tacú le cumais aerárthaí patróil muirí comhpháirteacha a fhorbairt;
- freachnaimh chomhpháirteacha thástála agus thurgnaimh a fhorbairt chun cumais mhuirí úrscothacha a fhorbairt amach anseo.

6. Oideachas agus oiliúint a chur ar fáil

Tá ardleibhéal oideachais, scileanna agus oiliúna speisialaithe fíor-riachtanach chun go mbeidh an tAontas in ann dul i ngleic leis na dúshláin slándála muirí atá ann faoi láthair agus a bheidh ann amach anseo. Chun dul i ngleic le bagairtí hibrideacha agus cibearbhagairtí nua, teastaíonn oibreoirí a bhfuil tacair scileanna digiteacha láidre acu agus cláir shonracha athscilithe agus uas-scilithe. Cuirfidh réitigh i bhfoirm malartuithe idir cláir oiliúna míleata, cláir chomhpháirteacha oiliúna idir cabhlaigh Bhallstáit an Aontais agus institiúidí éagsúla borradh faoin idir-inoibritheacht agus cuideoidh siad leis an Aontas freagairt do bhagairtí nua ar bhealach níos éifeachtaí, níos comhordaithe agus níos cuimsithí.

Mar chuid de *Practical handbook on European cooperation on coast guard functions* [an lámhleabhar praiticiúil maidir le comhar Eorpach i leith feidhmeanna garda cósta], cruthaíodh catalóg oiliúna, ina gcumhdaítear na cúrsaí go léir atá á reáchtáil ag Gníomhaireachtaí an Aontais i ngach réimse muirí. Tabharfar an lámhleabhar cothrom le dáta ar bhonn rollach i gcomhréir le riachtanais agus forbairtí. Ba cheart leanúint de thionscadal rathúil Lónra an Acadaimh Oiliúna um Fheidhmeanna an Gharda Cósta Eorpaigh agus den chúrsa oiliúna comhchuibhithe maidir le feidhm an gharda cósta, go háirithe an clár malartaithe, lena bhfuil baint ag tíortha comharsanachta agus ag an gcomhar réigiúnach trí thionscadal tiomnaithe a chuireann EFCA chun feidhme i ndlúthchomhar le EMSA agus Frontex. Tá cúrsa ar an gcibearshlándáil mhuirí á fhorbairt ag EMSA freisin. Eagraíonn an tIonad Barr Feabhais Hibrideach i Heilsincí cúrsaí agus comhdhálacha maidir le bagairtí hibrideacha a dhéanann difear don réimse muirí. Ba cheart tacú leis an gcomhionannas inscne agus le cumhachtú na mban in earnáil slándála muirí an Aontais, agus rochtain ar oideachas agus oiliúint theicniúil ardleibhéil do mhná á cur chun cinn.

Cuireann an Coláiste Eorpach um Shlándáil agus um Chosaint⁵⁶ oiliúint agus oideachas ar leibhéal an Aontais ar fáil do phearsanra sibhialtach agus míleata araon chun comhthuisceant ar dhúshláin slándála muirí a chur chun cinn agus chun feasacht a mhúscailt maidir le ról méadaitheach an Aontais sa réimse sin. Le tacaíocht ón gColáiste Eorpach um Shlándáil agus um Chosaint, tá sé cinn d'acadaimh chabhlaigh Eorpacha ag oibriú faoi láthair ar ábhar seimeastair cabhlaigh choitinn idirnáisiúnta.

Is iad seo a leanas príomhghníomhaíochtaí an Aontais maidir le hoideachas agus oiliúint⁵⁷:

- borradh a chur faoi chibearscileanna slándála, scileanna hibrideacha slándála agus scileanna

⁵⁶ Soláthraíonn an Coláiste Eorpach um Shlándáil agus um Chosaint, i gcomhthéacs an Chomhbheartais Eachtraigh agus Slándála (CBES), oiliúint agus oideachas ar leibhéal an Aontais, i réimse Chomhbheartas Slándála agus Cosanta (CBSC) an Aontais. Is é is aidhm dó comhthuisceant ar CBSC a fhorbairt agus a chur chun cinn i measc pearsanra sibhialtach agus míleata, agus dea-chleachtais i ndáil le saincheistean éagsúla CBSC a shainathint agus a scaipeadh, trína ghníomhaíochtaí oiliúna. Ar an gcaoi sin, comhlánaíonn an Coláiste Eorpach um Shlándáil agus um Chosaint na hiarrachtaí náisiúnta i réimse na hoiliúna agus an oideachais.

⁵⁷ Lena n-áirítear gníomhaíochtaí ar cuid iad de Bhliain na Scileanna.

slándála a bhaineann leis an spás trí thacú le cúrsaí oiliúna nua agus reatha a chuireann institiúidí acadúla éagsúla agus comhlachtaí inniúla náisiúnta nó de chuid an Aontais ar fáil, sna réimsí sibhialtacha agus míleata araon;

- cláir oiliúna thiomnaithe a chur ar fáil atá oscailte do chomhpháirtithe neamh-AE chun dul i ngleic leis na bagairtí ar an tslándáil mhuirí atá ann cheana agus atá ag teacht chun cinn;
- ‘seimeastar cabhlaigh idirnáisiúnta’ a fhorbairt faoin Tionscnamh Eorpach um Malartú Oifigeach Óg Airm⁵⁸;
- freachnaimh shibhialta-mhíleata a dhéanamh bunaithe ar chásanna a bhaineann le dlínse chomhroinnte nó úsáid chomhroinnte cumas.

V. UIRLISÍ AGUS IONSTRAIMÍ CHUN TACÚ LE GNÍOMHAÍOCHT AE MAIDIR LEIS AN TSLÁNDÁIL MHUIRÍ

Ba cheart an straitéis arna thabhairt cothrom le dáta a chur chun feidhme le díograis don chur chuige comhtháite chun sineirgí a uasmhéadú agus chun uirlisí agus ionstraimí comhlántacha AE a thabhairt isteach. Ba cheart na nithe seo a leanas a áirithiú leis sin:

- tionscadail chosanta T&F an Chiste Eorpaigh Cosanta chun borradh a chur faoi chumais fhórsaí armtha Bhallstáit an Aontais;
- an tSaoráid Eorpach Síochána mar shásra cistiúcháin seachbhuiséid do ghníomhaíocht AE faoin gComhbheartas Eachtrach agus Slándála a bhfuil impleachtaí míleata agus cosanta aige;
- taighde agus nuálaíocht an Aontais maidir le cumais shibhialtacha slándála muirí, go háirithe faoi Bhraisle 3 ‘An tSlándáil Shibhialta don tSochaí’ de chlár Fís Eorpach an Aontais;
- na deiseanna a chuirtear ar fáil leis an gCiste Slándála Inmheánaí agus leis an Ionstraim um Bainistiú Teorainneacha agus um Víosáil chun borradh a chur faoi chumais údaráis garda cósta na mBallstát a dhéanann cúraimí forfheidhmithe dlí agus rialaithe teorann ar muir;
- an Sásra Aontais um Chosaint Shibhialta, go háirithe trí thairbhe a bhaint as acmhainneachtaí anailíseacha agus freagartha chomh maith leis an moladh ón gCoimisiún a chur chun feidhme maidir le spriocanna athléimneachta de dheasca tubaiste;
- clár na hIonstraime um Chomharsanacht, Forbairt agus Comhar Idirnáisiúnta lena dtacaítear le comhpháirtíochtaí idirnáisiúnta chun feabhas a chur ar an tslándáil mhuirí, go háirithe an fheasacht ar réimsí muirí;
- an Ionstraim um Chúnamh Réamhaontachais (2021-2027), IPA III, mar gheall ar a raon feidhme agus a fócas ar thíortha is iarrthóirí;
- buiséad an Chomhbheartais Eachtraigh agus Slándála chun misin shibhialtacha CBSC a chistiú;
- an Ciste Eorpach Muirí, Iascaigh agus Dobharshaothraithe chun faireachas muirí agus comhar maidir le feidhm an gharda cósta a chistiú;

⁵⁸ <http://www.emilyo.eu/>; níl baint ag an Tionscnamh Eorpach um Malartú Oifigeach Óg Airm le Clár Erasmus+.

- Ciste Forbraíochta Réigiúnaí na hEorpa (CFRE) agus cláir Interreg lena dtacaítear le hinfheistíochtaí i réigiúin agus críocha cósta agus sna réigiúin agus sna críocha is forimeallaí agus i dtíortha a bhfuil teorainneacha muirí acu leis an Aontas;
- na Cistí Slándála Inmheánaí lena gcistítear an Lárionad Anailíse agus Oibríochtaí Muirí – Támhshuanaigh (MAOC-N) agus a chumais shonracha chun faisnéis a mhalartú chun dul i ngleic le gáinneáil ar dhruaí ar muir.

VI. AN BEALACH CHUN TOSAIGH

Oibreoidh an Coimisiún agus an tArdionadaí i gcomhar leis an gComhairle chun an straitéis nuashonraithe sin a chur chun feidhme sna réimsí gníomhaíochta a shainaithnítear thuas agus a shonraítear sa phlean gníomhaíochta, rud a chuirfidh leis an méid a bhain SSMAE amach ó bhí 2014 ann, agus úsáid á baint as ionstraimí agus beartais atá ann cheana, agus treoracha foriomlána an Chompáis Straitéisigh á leanúint.

Iarrann an Coimisiún agus an tArdionadaí ar na Ballstáit an straitéis agus an plan gníomhaíochta a fhormhuiniú. 3 bliana tar éis don Chomhairle an straitéis a fhormhuiniú, cuirfidh an Coimisiún agus an tArdionadaí tuarascáil chomhpháirteach ar dhul chun cinn ina mbeidh ionchur ó na Ballstáit faoi bhráid na Comhairle.